

COMUNICÂT STAMPE

LA FUARCE E LA ATUALITÂT DE OPARE DI FERIGO INTUNE GNOVE ANTOLOGJICHE

Udin, ai 27 di Novembar - Scritôr refinât par talian e cjargnel, storic, etnolic e animadôr culturâl de Cjargne, Giorgio Ferigo al è stât ancje ispiradôr e fondadôr dal grup Povolâr Ensemble che in dîs agns di ativitât al à savût puartâ indevant une inovative ricercje poetiche e musicâl su costums, contradizions e siums di une piçule comunitât tant che Comelians.

I trê album dal Povolâr Ensemble a son stâts metûts adun intun satûl che al è stât pensât de Associazion culturâl "Giorgio Ferigo", ent che al à chês di ordenâ, conservâ e tramandâ la ereditât culturâl e sientifiche di un dai plui impuartants oms di culture dal Friûl di vuê.

Nuie di nostalgjic in cheste edizion antologjiche publicade de Forum Editrice Universitaria, che e a vût la poie de Direzion regionâl Risorsis rurâls e agroalimentârs, de ARLeF-Agenzie regionâl pe lenghe furlane e dal Comun di Comelians.

La operazion culturâl e je stade presentade vuê tal detai te sede de Regjon a Udin ae presence dal curadôr de opare Toni Zogno - e component storic dai Povolâr dutun cun Francesco Vigato, Fiammetta Bagno - dal assessôr regionâl Claudio Violino, dal president de ARLeF Lorenzo Zanon, dal sindic di Comelians Flavio D'Antoni, dal president de associazion Claudio Lorenzini e dal autôr dai tescj Marco Stolfo.

Il president de ARLeF, Lorenzo Zanon, tal spiegâ lis reons dal sostegn al progjet al à volût rimarcâ la sô impuartance tant che investment a lunc tiermin, a pro des gnovis gjernaziis. "No o ai mai vût mût di cognossi di persone Ferigo ma lu stimi di simpri e par chest - al à spiegât Zanon - o vin fate daurman nestre cheste proposte che la associazion e la Forum nus an presentât. Al è un at che si scugne fâ par tignî vive la opare di une des personalitâts plui impuartantis de culture furlane dai ultins cincuant agns e al è un investment che o fasin ancje pai plui zovins che a podaran cussì preseâ la fuarce e la atualitât dal patrimoni linguistic, culturâl e musicâl che Ferigo al à savût lassâ".

In ocasion de publicazion che e met dongje dutis lis cjançons dal Povolâr - ancje chês mai scoltadis o publicadis e ancje cualchi 'live' registrât a Tumieç tal 1988 par i dîs agns dal ensemble - foto, documents, testimoneancis e imagjinis dal grup, il president de associazion Lorenzini al à fat savê che martars ai 18 di Dicembar aes 20.30 si tignarà al Palamostre di Udin un event dedicât aes musicis e ai tescj dal grup nassût tal 1977 e che cu la sô produzion al à segnât l'inizi de 'gnove musiche furlane'.

Elisabetta Pozzetto

Regjon Autonome Friûl Vignesie Julie
[ARLeF - Agenzie Regionâl pe Lenghe Furlane](#)
Place XX Setembar 23
33100 Udin

0039 0432 555724 fax 0432 204158
mob 0039 335 8002058